

Pomolowany kříž a wosebite lěto

Žohnowane a strowe nowe lěto wam přejemaj, lube džěci! Njedawno, na přěnich džěcacych kemšach tohole lěta, je knjez farar prajił, zo je to cyle wosebite lěto, mjenujcy Swjate lěto. W předowanju wón nam rozkládže, zo cyrkej tajke kóžde 25 lět swjeći. W Pětrowej cyrkwi w Romje je bamž Franciskus k tomu patoržicu cyle wosebite durje wotewrěł, tak mjenowane Swjate wrota, a tak Swjate lěto zahajił. Wrota su hewak zamknjene a zamu-

rjowane. Dale knjez farar wujasni, zo chce bamž Franciskus ze Swjatym lětom wšitkich křesćanow – potajkim tež Hańžku a mje – k tomu pozbudžować, zo móžemy so ze wšěm, štož nas zaběra Bohu přiwobroćić. Směmy jeho wopomoc prosyć, abo so jemu za wšo džakować, štož wšědny dzeń dožiwjamy – hač ze swójbnymi doma abo z přečelemi w šuli. Haj, Bóh chce, zo swój počah k njemu pohłubšimy a swoju wěru skrućimy.

Za serbske wosady bu Swjate lěto njeźelu, 12. januara, w Róžeńčanskej putniskej cyrkwi ze swjatočnym nyšporom zahajene. Na nim smój so Hańžka a ja tež wobdžěliłoj. Tam smój zdobom zhonitoj, zo kříž w srjedzišću Swjateho lěta stej. W Drježdžansko-Mišnjanskim biskopstwje je to kopija ikony kříža, před kotrymž je so hižo swjaty Franc Assisiski modlił. To je pisany pomolowany kříž, na kotrymž su Jězusa a wšelake dalše wosoby z biblije



widjeć, kaž namaj Hańžcyna mać rozjasni. W Róžeńce stejše wón we wołtarnišću. Ale zhonichmój tež, zo budže kříž po serbskich wosadach pućować. Wjeselimoj so hižo, hdyž přińdže do našeje wosadneje cyrkwy. Potom chcemoj sej jón mjenujcy raz woměrje bliže wobhladać.

Žohnowanu njeźelu přejetaj wam Hańžka a Feliks.

SWJATE LĚTO 2025

- ➔ wosebite jubilejne lěto katolskeje cyrkwy
- ➔ zaměr: swoju wěru wobnowić a počah k Bohu pohłubšić
- ➔ zakład: jubilejne lěto, kotrež je w starozakonskej Knize Lewitikus (Lew 25) wopisane → tam kóžde 50 lět
- ➔ dalše pomjenowanje: lěto spušćenja dołha → To woznamjenja: Běše-li něchtó něhdy na příklad jara chudy a dyrbeje tohodla swój dom předać, je jón w Swjatym lěće zaso dóstał, bjez toho zo za njón něšto zaplaći. Dołh abo wina buštej jemu spušćenaj.
- ➔ přenje Swjate lěto: 1300 pod bamžom Bonifacijom VIII. zwołane → Bamž Pawoł II. pak 1470 rozsudzi, zo ma so Swjate lěto kóžde 25 lět wotměć.
- ➔ k wosebitym přiležnosćam wurjadne Swjate lěto → na příklad Swjate lěto Božej smilnosće 2016



Mangowa figura „Luce“ je maskotka Swjateho lěta 2025. „Luce“ rěka přeložene swěto.



Wotpusk zdobyć woznamjenja, zo so člowjekej časne chłostanja za hrěchi spušća. Měnjene su scěhi hrěcha, kotrež tež po wodaču wostanu. Štóž je na příklad wo někim zle blady šeril, tomu drje bu w spowědži hrěch wodaty a wón wot winy wotwjazany. Scěh tajkeho wopačneho swědčjenja wo druhim pak je, zo njemóžeš blady wróćo zwołać.



➔ hesło Swjateho lěta 2025: „Putnicy nadźije“



- ➔ kříž jako znamjo stej w srjedzišću tohole Swjateho lěta
- ➔ přeni raz tež maskotka za Swjate lěto wabi → mangowa figura „Luce“



Ministrantaj w Róžeńce džeržitej kopiju ikony kříža, před kotrymž je so swjaty Franc Assisiski modlił. Kříž je znamjo Swjateho lěta w Drježdžansko-Mišnjanskim biskopstwje.

Logo Swjateho lěta 2025



centralne elementy Swjateho lěta:

- ▶ do Roma putnikować
 - ▶ jedne ze Swjatych wrotow w štyrjoch hłownych cyrkwach Roma (Pětrowa cyrkej, bazilika Santa Maria Maggiore, bazilika Swjateho Pawoła před murjemi, Lateranska bazilika swjateho Jana) překoćić, k swjatej spowědži hić, na eucharistiji so wobdžělić a z tym wotpusk zdobyć
- K tomu słuša tež so modlić, pokućić a wo skutki křesćanskeje miłosće so prócować. Štóž njemóže do Roma putnikować, móže wotpusk w biskopskich a druhich za to postajenych cyrkwach zdobyć. W Drježdžansko-Mišnjanskim biskopstwje su to nimo katedrale w Drježdžanach konkatedrala w Budyšinje a putniskej cyrkwi w Róžeńce a we Wechselburgu. W Zhorjelcu stej to katedrala swjateho Jakuba w Zhorjelcu kaž tež klósterska cyrkej w Nowej Calu.



Swjate wrota Pětroweje cyrkwy, kotrež je bamž Franciskus patoržicu wotewrěł a tak Swjate lěto zahajił